

Juan Jose Lizarbe

• PSNKO IDAZKARI NAGUSIA •

«Nafarroako Hizkuntza Politika Sailean daudenek aberria egiten dute»

■■■ Nafarroako sozialisten buruzagiak dioenez, Gobernuan zeudenek nahi zutena baino harantzago joan da Hizkuntza Politika Saila, eta hori gai honi garrantzia eman ez zaiolako izan da. ■■■ Juan Jose Lizarbek berretsi egin du erdaldunak diskriminatuta daudela Administrazioan sartzeko eta Unibertsitateak ez duela elebiduna izan behar.

HIZKUNTZA Politikaren norabidean ibili da, aste honetan, politika bera ere Nafarroan. Erdi-erdian, PSN, bai joan den asteko larunbatean onartutako adierazpen politikoarengatik, bai bere proposamena zela medio eztabaida sortu zelako gaiaren inguruan, joan den asteazkenean, Parlamentuan.

Juan Jose Lizarbe PSNko idazkari nagusiak badaki bera gabe UPNk ezin duela ezer aurrera atera, baina badaki ere haiek ezin direla azaldu ariete gisa, bere botoemaile askoren artean ere kostu politikoa edukiko lukeelako horrek. Ostira-lean eskainitako elkarrizketa honetan, horregatik, antzematen zaio abertzaleak dituela benetako kezka, euskara bera barik.

■ **Duda bat argitu lehen-dabizi. Polemika hau guztia piztuko zen Sanzek esan zuena esan izan ez balu?**

Ez, ez zen nahas-mahas hau guztia gertatuko —azken finean nahas-mahas izugarria gertatzen ari delako— baina gaiari helduko genion hala ere. Aspaldian ari ginen gaia ikertzen, PSNren inguruan kezka bazegoelako. Euskararen Legea onartzeko garaian gure taldeak ahalegin handia egin zuen kontsentsua lortzeko lurralde honetako zentralitate politikoarekin —abertzale moderatuak, eskuinaren zati bat...— baina geroztik distortsioak gertatu dira. Esate baterako, HBrentzat euskara funtsezkoa da Euskal Herriaren erakuntzarako, eta hori ez zaigu iruditzen modurik onena euskarari laguntzeko. UPN ere erabiltzen ari da euskararekin zerikusi duen oro, eta hori arriskutsua da. Guk gure gogoetarekin jarraitu izan bagenu lasaiago egingo



OSKAR MONTERO

Elebitasuna

«Guk ez dugu uste euskararen egoera normalizatu beharko denik. Zer da normalizatzea? Nafar guztiek euskaraz jakitea? Bada hori ez da gure helburua»

genituen gauzak, jendearekin hitz egiten, eztabaidatzen...

■ **Kritikak hain zuzen etorri dira esanez zuek UPNren amua irentsi duzuela. Zerorri haserretu zinen Jesus Laguna kontseilariarekin Parlamentuko eztabaidan, ez zelako agertu Euskararen Legea aldatzearen alde.**

Bai, bagenekielako UPNk nahi zuela Euskararen Legea aldatu. Guk gaia zentratu nahi genuen, itzuli 1984ko kontsentsura baina, harrigarria bada ere, azkenean Gobernuak esan du ezetz, ez duela legea aldatu nahi. Tira,

gure estrategiak balio izan du bederen UPNren asmoak —euskararen garapena errotik moztea— geldiarazteko.

■ **Duela hiru urte euskararen irakaskuntza zonalde ez euskaldunetan ere posible egiteko EAren proposamenaren alde egitekoan egon zineten. Ze aldatu da PSNren barruan azken urteotan?**

Orain egoeraren balorazio orokorragoa egin dugu, baina ez da aldaketa politikorik izan. Guk ez genuen EAren proposamena gaizki ikusten eremu ez euskaldunetan euskaraz ikasi nahi duenak legalki ezin duelako hori egin,

eta azkenean soilik ikastoletan dauka aukera. Hori konpondu beharra dago. Orain egin dugun hausnarketa politikoan aipatzen da formulak bilatu behar direla zonalde ez euskaldunetan ere euskaraz ikasi ahal izateko, ze, bestela, egoera ez-legezkoak sortzen dira. Baina berdin pentsatzen dugu, eta pentsatzen genuen, Unibertsitatea, esate baterako, gatzeleraz behar duela.

■ **Unibertsitatean euskara bultzatzearen aurka zaudete, beraz.**

Unibertsitatea elebiduna izateak ez du ez euskararen garapena bultzatuko ez geldiaraziko. Bermatu behar dugu euskaraz ikasi duena, Unibertsitateetik ateratzen denean gai izango dela bere lana euskaraz egin ahal izateko...

■ **Unibertsitatean gaztele-raz ikasten badu, zaila dirudi...**

Ez, ze Unibertsitatera ez

gara joaten hizkuntzak ikas-tera, baizik Zuzenbidea ikas-tera...

■ **Zuzenbidea euskaraz ere ikas daiteke.**

Bai, baina hizkuntza bakar batean askoz merkeagoa da.

■ **Eskubideak eta ekonomia parekatzea...**

Ados, baina eskubideak eraginkorrak dira dauden baliabide ekonomikoaren arabera.

■ **Hain zuzen ere, Jesus Laguna Hezkuntza kontseilariak Parlamentuan egin zuen agerralditik azpimarka daiteke Unibertsitaterako legea egiteko proposamena. Bat zatozte ideiarekin?**

Bietako bat: Unibertsitateak bere arautegia onartzen du edo guk arautu beharko dugu. Gu aztertzen ari gara gaia, baina egia da Unibertsitatean badirela taldeak lanean ari direnak unibertsitatea elebiduna izan dadin. Ez gaude ados.

■ **Baina arazoa ekonomikoa da soilik? Zergatik izango litzateke berez txarra Unibertsitate elebiduna?**

Denok elkar ezagutzen dugulako. Unibertsitatea da gizarte baten aitzindaria eta ez dugu, berez, gai honekin kezkatuta egotea nahi. Unibertsitateetan hizkuntza ez da inoiz kezka izan.

■ **Ikasleen %19 euskalduna bada eta irakasleen %15 gai bada euskarazko klaseak emateko, garbi dago eskaria badagoela.**

Aurrekontua bikoiztu egin beharko luke Unibertsitateak.

■ **Lehenengo eguneko txosten politikoan baziren hainbat adierazpen polemiko. Esate baterako hizkuntza politika abertzaleen esku dagoela eta kontrapisua jarri behar zaiola. Azalduko zenuke gehiago?**

Bai, adierazpen gogorra da, eta akaso bidegabea norbaitek. Baina badugu sententzia alderdi ez-abertzaleak ez direla hizkuntza politikaren gainean egon: ez zaio garran-